

Te Heheuraa Api

E ITE IĀ OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 9

--TETEPĀ 1951--

MAT. 38.

Haha te Qhipa o te Haaroo.

Ua Tuuhia te hoê ohipa fifi i to te ao paatoa nei. Mai te mea e, te vai nei te Atua, e e parau mau te mau ohipa a Iesu Mesia, te vai ra te tabi ao i mua'tu ia tatou nei, ei reira ia e nehenehe ai ia tatou ia farii i te oaoa mure ore. E hoê opuaraa ana'e tei tuuhia mai ia tatou i nia i teie ao nei ia roaa mai taua oaoa e te mau haamaitairaa hoi. E hoê ravea ana'e ia tei tuuhia mai.

Aita e tia ia tatou ia feruri i te mau huru o taua ao oaoa ra. Te ite nei râ tatou i te mau mea o teie ao tahu-ti nei ma te aehuehu, te peapea, te oto e te mau mea ino atoa. No reira, te hinaaro nei tatou i taua ao nehenehe ra. Ua parauhia ra te vai nei e hitu hanere tiahapa Ekalesia i te ao nei. E ere te Atua ite taata anoi noa. Aita Ona i faatupu i taua mau Ekalesia ra, maori râ, hoê ana'e. Ua na ô maira te Hatu. "*E tomo na te uputa pirihaa: te atea nei hoi te uputa e te aano nei te e'a e tae atu ai i te pohe.*" *Matara 7:13.* No reira, o vai ra taua hoê ra? Te uputa ia.

Mai te mea e, e taata haavare o Iosepha Semita, e haavare rahi roa te Ekalesia a Iesu Mesia i te Feia Mo'a i te Mau Mahana Hopea Nei. Mai te mea râ e, e Peropheta mau oia, o teie ia Ekalesia e te uputa mau. Te farii nei tatou ia'na ei Peropheta mau na te Atua, i faahoihia mai ai te Ekalesia mau i to te ao nei.

Ua faahiti-pinepine-hia te aamu no Iosepha Semita ra, noa'tu râ, e oaoa tatou ia faaroo i te reira, no te mea, e aamu putapu te reira—ua faahoihia mai te Ekalesia a Iesu Mesia ia tatou i teie mau mahana hopea nei. E neheneheia taton ia oaoa i te reira no te mea e, ua tupu te mau tohuraa tabito tei papaihia i roto i te Bibilia. Ua faahoihia mai te mana ia tatou ia farii i te haamaitairaa rahi a te Atua, oia hoi, te Ora Mure-ore.

Ia haamana'o faahou tatou i to Iosepha aamu i to'na tamariiraa, e tia'i, te feruri ra oia e, tei hea ra te Ekalesia tano ia riro ei melo? Te tama'i ra teie Ekalesia i tera Ekalesia e te tahi i te tahi ê atu. E ua paran mai ratou pau roa e, o matou ia te Ekalesia ta Iesu i faatupu ra. Ua hiuaaro ona ia farii i te maramarama na roto mai i te Bibilia, e na taua mau taata faatere Ekalesia e tatara i te mau irava tumu. Aita râ i tia, no te mea, e mea é ia ta teie taata tatararaa e e mea é hoi ta te tahi râ. Te faaroo ra oia i te Atua ora, noa'tu râ i to'na faaroo, ua feruri ona te vai nei anei To'na Ekalesia mau i nia i te ao nei e aore râ ua hape te taatoaraa?

A taio ai oia i te Bibilia i te hoê mahana ra ua taio ona i te hoê irava tei papaihia Iakobo pene hoê irava pae e te ono. *“Te ere ra râ te hoê o outou i te îte, e ani oia i te Atua ra, o tei horoa hua mai i te maitai i te taata atoa ra. ma te patoi ore, e e horoahia mai ta'na. E ani râ oia ma te faaroo, eiaha e feaa, o tei feaa ra, e au ia i te are mîti i pa-*

tuhia e te mata'i e fetoitōi a'era." E tamaiti haapii-ore hia o Iosepha. Aita ona i haapii i te mau haapiiraa maramarama. E no te reira, no to'na faaroo hoi i te Atua ua îte papuroa oia e, e mea tia ia ani atu i te Atua i te maramarama i te Ekalesia mau. Haere atura oia i te uru raau e pure ai i te Atua ra. Na roto i tana orama matamua ra, ua faaitohia ia'na e, aita hoê Ekalesia tano i nia i te ao nei, tera râ. ua tae i te tau e faahohia mai ai te Evanelia, e i muriho ua na reirahia ia.

Ua faahapahia tatou e te tahi mau taata ê no to tatou faaroo i te peropheta o Iosepha Semita. No te mau haapiiraa tei roto i te Bibilia mo'a, e ere i te mea huru ê te mau orama a Iosepha e e ere i te mea ê ia farii tatou i te heheuraa i teie iho tau nei. Ua parau atura Petero e, "*E ere hoi i to te hinaaro o te taata i tae mai ai te Tohu i to tahito ra; o te mau taata mo'a râ o te Atua tei parau i ta te Varua Maitai i tuu mai ia ratou ra. (II Petero 1:21-22)*" Na roto i teie nei parau te îte nei tatou e, e ere i te mea tia i te Atua i te horoa i ta'ua parau i to te ao paatoa nei, maori râ, ia faaroo ratou ia'na. Ua tohu mai te mau peropheta i te taime te Varua Maitai i faauru ai ia ratou ra. E mea papuroa ua vahohia ratou i roto i te poiri i muriho ite tau o ta Iesu mau Apotetolo ra, no te mea ua moe te Atua e ta'na mau tavini ia ratou. Ua ore te faaroo i te Atua ua rahi to ratou hinaaro ite ohipa ino e te faufau hoi. No to tatou râ faaroo i teie tau i tia faahou ai ia tatou ia farii i Ta'na ra parau. Aita te Atua i faataa i te hoê tau no te heheuraa. Te faarihia nei te reira e te faaroo mai tau tahito ra.

Teie nei râ, mai te mea e ua faahohia mai te Evanelia, te hinaaro nei tatou ia îte i te reira e ia roaa ia tatou te maitai no roto mai ite reira. Nahea râ tatou e îte ai i te reira? Nahea râ taton e îte ai e parau mau anei tana mau heheuraa

apî ra e aore râ aita?

Te matamua — Ia hinaaro tatou i te îte i te parau mau, mai ia Iosepha i hinaaro, e tia'i. E e mea tia ia haamana'o atoa tatou e, e hoa mau te haehaa o te aau no te hinaaro i te îte a te Atua.

Te pitiraa — Ia taio tatou i te mau papairaa mo'a ta-hito e te mea apî atoa hoi, e tia'i. A faaroo te taria i te mau mea te a'ohia nei e te Ekalesia, e feruri maitai i te reira mai ia Paulo i a'o atu i to Hebera.

“Te parauhia nei hoi taua Evanelia ra ia tau nei, o tei parauhia'tu ia ratou ra; aita râ ratou i faufaahia i taua parau i parauhia'tu ia ratou ra, no te mea aore i anoihia i te faaroo e te feia i îte ra (Hebela 4:2.) O te mau taata e faaroo nei, o te ô ia i te faaeearaa o te Atua. Te mau taata râ eita e ô i roto ra, o te mau taata faaroo paruparu ia e aita ratou i papu i te parau mau i te taime i a'ohia'tu ra. Ua parau atoa'tu Paulo e, “o te parau ia (te mau papairaa mo'a) e paari ai oe e tae noa'tu i te ora i te faaroo i te Mesia ra ia Iesu.” (II Tim. 3:15.)

Te toruraa — Na o maira Ioane e, mai te mea e haapao tatou i te hinaaro o te Atua e îte ia tatou i te mau mea e te Atua. (Ioane 7:17.)

Eaha Ta'na hinaaro i nia i teie mana'o, maori i, ia ani atu tatou ia'na no te pahonoraa na roto i te pure ? I te pae hopea ra o te Buka a Moromona ra, na papai mai Moroni i te taio i taua buka ra e, *“E o teie ta'u a'o ia outou na ia itea teie nei mau parau ia outou, e ui atu i te Metua mure ore ra, i te io'a o Iesu Mesia e, e parau mau anei teie mau parau, e aore anei, e ia ui atu outou ma te aau hinaaro mau, ma te mana'o papu, e te faaroo i te Mesia, na'na ia e faaite mai i te parau mau ia outou na roto i te mana o te Varva Maitai.”*

(Moro. 10:4.)

E teie nei, mai te mea e ua faafariuhia mai tatou i te Evanelia mau, ma te faaroo papu e, e tavini mau ia taua mau peropheta na te Atua e ta ratou ra mau tohuraa hoi, e rave tatou i ta'na ohipa ma te puai, e te anaanatae, e te tutuu ore, ia ô tatou i roto i te uputa tano, e ia taiohia tatou ei melo no to'na nânâ ra. Te îte papu roa nei ia tatou i te parau mau, e aita e tia i te hoê mea ia faataupupu ia tatou i te ohipa tia ra ia ore tatou e faarii i taua haamaitairaa rahi ra.

E te ite atoa nei tatou e, e mea faarue ore ia te faaroo na roto i te Evanelia. E taahiraa tia ia te reira i te e'a afaro ra. No te faaroo ore o te taata, ua taiva ê atu ratou i te Ekalesia mau. No te faaroo mau o te taata nei, i faahoihia mai ai te Evanelia. E no to tatou iho faaroo, e îte ai tatou e, e parau mau ia teie ohipa.

E mea nehenehe te Evanelia, mai ta Paulo i parau mai, "*Aore hoi au i haama i te Evanelia o te Mesia ra, no te mea, o te mana ia o te Atua, ia ora te feia atoa i faaroo ra; te ati Iuda na e te Heleni atoa hoi.*" (Roma 1:16)

e Jay Larson

EDITORIAL

TAO'A

Ia faaroo tatou i teie nei parau, oia hoi, Tao'a, e haamana'o tatou i te mau mea no teie nei ao, te Ario, te Auro, te fenua rahi, te fare nehenehe, te mau ahu maitai, te pahi e te pereoo uira. E tirara te ohipa maori ra, ia parahi noa mai te ohipa ore, e ia haapao i to'na hinaaro, tera to tatou mana'o i te taata tao'a, e te mana'o nei tatou

e, e taata oaoa roa oia, e e taata peapea ore oia, no te mea tei ia'na te mau mea maitai atoa no teie nei ao. Ia feruri maitai ra tatou i te huru mau o te tahi mau taata tao'a e îte tatou e, ua rahi roa te oaoa e te mauruuru i roto i te aaui o te taata aita ta'na e hoê pene i roto i to'na pute.

Te haamana'o nei au i na tamaiti e toopiti; Ua fanau mai raua i roto i te hoê oire, hoê â haapiiraa ta raua i haere e ia mahiti mai raua no roto mai i te haapiiraa, ua haere te hoê, o Ioane to'na io'a, i te hitia o te râ ia imi i te faufaa no teie nei ao na'na, te piti, o Toma, to'na io'a, ua haere atu oia i te tooa o te râ ia imi i te faufaa na'na, e ua itoitoe roa raua i te ravearaa i te ohipa.

Ua mairi e 20 matahiti, e aita tatou i îte i to raua huru. Teie nei mahana ra, ua hoi mai raua i to raua fenua ai'a mau, o Ioane, e taata nehenehe ia, e pereoo to'na, ua i to'na pute i te moni e te vai ra ta'na mau fenua e ta'na mau nânâ e rave rahi, e te hi'o mai nei te mau taata tei îte ia'na i te matamua, e te parau mai nei ratou e, o Ioane rahi e, "e taata moni oia, e taata manuia roa Ioane, ahiri van mai Ioane te huru, ua hope to'na oaoa, e e parau atu te mau metua i ta ratou mau tamarii," "ia paari oe, a rave oe i te ohipa mai ia Ioane te huru, a pee oe i to'na ra haereraa no te mea e, e haereraa manuia roa ia te reira."

I te taeraa mai o Toma i roto i te oire. Ua haere mai oia mai te tahi mau taata te huru, aita to'na e pereoo, e ahu nehenehe to'na, e moni to roto i to'na pute, e fare e e fenua to'na e ere râ mai to Ioane te huru. E ua parau te mau taata tei îte ia'na i te matamua, e taata hupehupe o Toma, e ta'na ohipa e ere i te mea manuia, aita oia i îte i te faatereraa mai ia Ioane te huru. E ua parau atu te mau metua i to ratou mau tamarii, eiaha outou e pee atu ia Toma,

no te mea e ere oia i te taata itoito e te manuia, e ere to'na i te haereraa maitai.

I muri mai ra na iteahia to raua huru mau ua rave itoito Ioane i te ohipa, e ua tauturu mai te Atua ia'na, e ua rahi ta'na faufaa no teie nei ao, e ua haapao maitai oia i te reira, aita ra oia i tauturu i te taata tupu te roohia e te ati, aita oia i faaamu i te mau otare e te mau vahine ivi, na roto i to'na imiraa i te faufaa no teie nei ao, ua riro to'na aau mai te ofai te huru, aita oia i îte i te peapea o to'na mau taeae, to'na na taria ua turi ia, no te mea aita oia i faaroo i te hoê re'o o tei parau e, "E mea hau a'e i te maitai ia horoa'tu i te rave mai." E teie nei ua paari o Ioane, e e mea poto to'na oraraa i roto i teie nei ao, e haere atura oia i te vahi ta'na i faanehenehe no'na iho, e ua îte tatou e ere te vahi maitai, no te mea, i roto i to'na oraraa i roto i teie nei ao, aita oia i haamana'o e, e mea tia ia faatia e ia faanehenehe oia i te hoê fare i te rai no'na, e tia'i. E teie nei ia faarue oia i teie nei ao e vaiho oia i ta'na tao'a e te mau mea ta'na i haaputu i roto i teie nei ao, e haere atura tera ao, ei taata veve, aita to'na e fare, e te hoê mea i reira.

O Toma ra, ua rave itoito atoa oia i te ohipa, e ua tauturu te Atua ia'na ra, e ua rahi te faufaa ta'na i noaa, area râ, ia îte oia i to'na taata tupu tei roohia i te ati, ua horoa oia i te moni e te mau mea ei tauturu raa ia'na. Ua faaamu oia i te otare e te vahine ivi, e ua haere oia na roto i teie nei ao, ma te imi i te ravea i tia ia'na ia tauturu e ia faatupu i te oaoa i roto i te aau o to'na mau taeae.

E teie nei, ua poto to'na oraraa i roto i teie nei ao e e mea iti ta'na moni e ta'na faufaa i tae mai, area râ, na roto i to'na haapao maitairaa i ta'na faufaa i roto i teie nei ao, ua

noaa mai ia'na te hoê parahiraa maitai e te nehenehe no'na i tera ao, e ua riro teie nei mau mea ei tao'a na'na e a muri noa'tu.

Ua haere mai Iesu i roto i teie nei ao, mai te taata veve, area râ, ua faatupu oia i te oaoa i roto i te taata nei. Ua faaora oia, i tei pohe i te ma'i, ua faatia oia i te feia i pohe roa, e ua tamahanahana i te feia tei roohia e te ati.

Ua horoa Oia i to'na ora ia tauturuhia ta'na mau tamarii, aita ra ta'na e hoê pene.

Eiaha e haapue noa i te tao'a na outou i teie nei ao, i te vahi e pau ai i te huhu e te pé, i te vahi e tomohia'i, e, e eiâhia'i e te eiâ: E haapue râ i te tao'a na outou i nia i te ra'i, i te vahi e ore e pau ai i te huhu e te pé, e ore hoi te eiâ e tomo i reira a eiâ ai.

L. R. M.

TE AMUIRAA MATAMUA NO TE FEIA APÎ

I Roto Miti, Utaha, i te ava'e Tiunni i te mau matahi-ti atoa. Ua faaterehia e te Ekalesia nei te hoê amuiraa rahi no te Feia Apî. E i roto i taua amuiraa ra ua haapii maitai hia te Feia Apî i te mau ohipa faatere, e te mau haapiiraa, e te mau oriraa nehenehe, e te mau ohipa sport, e te tahi atu a mau ohipa. Ua tupu te hinaaro ia'na reira atoa tatou i teie Misione e ua maitihia te fenua ra Takaroa no te faatia raa i taua ohipa matamua ra.

I te 25 no Tiurai na faarue Paraita i Papeete. Tei nia

iho ia Paraita to tatou Peretiteni e to'na hōa, Muria. te mau feia faatai pu, te pupu basketball, te pupu kitara, e te pupu himene, e mau feia apî ana'e ratou no te amaa i Papeete nei.

Ua tapae ratou i Makatea e ua faarii-poupou-hia ratou e to tatou mau taeae i reira. Ua faatupuhia e te mau melo e to tatou mau hōa i te hoê tamaaraa rahi e na hōroa mai ratou i te mau huru maa e au no te tamaaraa no te Arii. I muri iho ua faaterehia te hoê hautiraa popo i ropu i to Pepeete e to Makatea. I te hora 8 i te po ua tairuru mai te mau taata i te mahora e ua faatai to tatou pupu pû i te hoê Concert e ua maururu te mau taata tei faaroo i te reira. E i te hora ahuru ma piti i te pô ua reva atu ratou.

I te mahana maa i te ahiahi na tae atu ratou i Takaroa. I to ratou tapaeraa i reira ua faarii-poupou-hia ratou e te mau taata i te pae nahu. I te reira pô na faarii-faahou-hia ratou e te Feia Apî no Takaroa i roto i te fare pureraa. Ua faatae mai ratou i to ratou aroha na roto i te mau himene navenave e te mau a'oraa nehenehe.

Ua faaterehia te amuiraa i na mahana e maha, e na te feia apî iho i faatere i te mau ohipa atoa mai te mahana matamua o te amuiraa e tae noa'tu i te hopea, ua tupu te oaoa e te anaanatae i roto i te feia no tana fenua ra i to ratou faarooraa i te pupu pû tei faaterehia e to tatou Peretiteni, Leroi, mai te au tei faaterehia e ana i to'na na tau e piti i mutaa ihora i nia i te fenua Takaroa.

Ua faatupuhia e ua faaterehia atoa hoi te mau ohipa Sport no te Feia Apî. Rave rahi te mau ohipa tei ravehia i tana mahana ra, oia hoi, te Basketball, tue raa popo, e te tahi atu â mau ohipa mai te reira te huru. Ua faatere-atoa-hia te tahi mau himeneraa, oia hoi, te himene kitara, himene

tarava, himene nota, e tae noa'tu i te pupu himene feia api no Takaroa. I te hoê po ua faaterehia te hoê oriraa nehe-nehe roa tei parauhia e tatou "Le Bal Or et Vert." Ua faaea ratou i na mahana e ono i taua fenua ra e i te ahiahi Mahana Pae ua reva mai ratou i Fakarava, e ua faarii-maitai-hia ratou e te mau taata no taua fenua ra. Ua faaterehia te hoê Concert i te po Mahana Maa no te huiraatira no Fakarava, e ua mauruuru roa ratou no te reira.

I te poi poi roa o te mahana Sabati ia, ua faatanohia to ratou aveia no te tereraa atu i te fenua, Faaite. I to ratou tapaeraa i reira, aita ratou i haere i uta, maori ra, te Peretiteni e to'na ra hoa, e ua faarii-maitai-hia raua e ua farerei raua i te mau melo no te taime poto.

Monire i te hora ahuru ma hoê i te pô ua tapae faahou mai ratou i Papeete nei, ma te oaoa e te mauruuru rahi no te amuiraa e te hoê tere hau i te maitai e te uehenehe, e ma te pure haamaitai i te Atua i roto i to ratou aau no Ta'na tiahi raa e Ta'na mau tautururaa i nia ia ratou a tere ai ratou'na te moana rahi.

No reira, te feia api no te Ekalasia no teie pae au moana nei, a faaitoito tatou e faaineine tatou no to tatou amuiraa i teie matahiti i mua nei.

Ua papaihia i raro nei te tahi mau aoraa tei a'ohia mai e te feia api i mua i te aro o te mau taata i roto i te amuiraa i Takaroa ra.

Te Tumu O Te Feia Api.

[Ito Birikama Iouna e te Feia Mo'a tapae raa i Utaha hanere e tiahapa matahiti i mairi a'e nei, no te mea hoi o ratou te mau taata matamua i reira tei opua i te imi i te hoê mau faaare'are'araa na ratou no te tamaruraa i to ratou ra mau rohirohiraa ohipa. Ei reira hoi to Birikama Iouna opuaraa i te faatia i te hoê mau pupu ohipa na te

Feia apî no te Ekalesia, ia tia ia ratou ia faatere i ta ratou iho mau hautiraa i te pae tino e te pae varua hoi. No reira faatiahia'tura te pupu Feia Apî Vahine i muri iho te pupu Feia Apî tane te parauhiaraa e, te pupu Feia Apî no te Ekalesia. Maiti atura oia i te mau Feia Apî i roto i te mau toroa faatere o taua pupu Feia Apî ra. Mai taua mahana ra e tae roa mai i teie nei mahana te tere noa ra taua ohipa ra mai te manuia rahi i raro a'e i te faatereraa o te Peresiteniraa Matamua o te Ekalesia Nei.

O teie te tumu mau i faatiahia'i te Pupu Feia Apî, oia hoi, ia tanu, e ia faatupu hoi i te faaroo i te Mesia, e i ta'na Evanelia, i roto i te aau o te Feia Apî, ia noaa ia ratou te ite papuraa e, e Peropheta mau o Iosepha Semita, e o teie ihoa te Ekalesia mau a Iesu Mesia i nia i te ao nei. Na te reira ite e faatupu i te hinaaro, i roto i te Feia Apî, ia haapao maitai i te mau ture e te mau faaueraa o te Evanelia nei na roto i te haapiiraa o te Evanelia e i te mau ohipa faaare'are'a atoa hoi. Mai te taima i faatiahia'i te Pupu Feia Apî tane, e te Pupu Feia Apî Vahine ua tamata noa te mau taata faatere o taua na pupu ra i te faatupu i teie na ohipa e piti: Te Matamua ra: ia faatupu i te faaroo mau ite Evanelia a Iesu Mesia tei faaho'ihia mai i roto i teie tau hopea nei. Te piti ra: ia faatupu i te tahi mau ohipa faaare'are'araa e au no te Feia Apî no te faaanaanataeraa e no te faaitoitoraa hoi ia ratou ia rave i te ohipa maitai a te Atua ra. I roto i te mau haapiiraa na te Feia Apî, ua faataahia te hoê taima no te haapiiraa i te mau parau o te Evanelia, no te faatupuraa i te faaroo mau i te Evanelia a Iesu Mesia ra. Ua faataa atoahia te tahi mau ohipa faaare'are'araa no te faaanaanataeraa, e no te faaitoitoraa hoi i te Feia Apî.

Ua riro teie nei Pupu Feia Apî ei pupu rahi roa i roto teie nei ao. E rave rahi te Feia tei amuihia mai i roto i teie nei pupu. Tatou atoa te Pupu Feia Apî tei tae mai i Takaroa nei e tufaa ia no taua pupu Feia Apî ra, o te reira hoi ia te tumu i amuihia mai ai tatou i uia iho i teie nei fenua i roto i teie amuiraa. E faatupubhia te mau hautiraa, te Basketball, te oriraa, te himeneraa e te vetahi atua ohipa no te haamoriraa i to tatou Atua i te ao ra. Mai te mea tatou te Feia Apî no te Ekalesia nei e, e rave itoitonoa tatou i roto i te mau ohipa na te Feia Apî mai te tamata noa i te mau taima atoa i te haapaoraa i to tatou mau tino ia ma rave noa'i tatou i te mau ohipa na te Feia Apî, ua manuia roa tatou e te ohipa a to tatou Metua i te ao ra, ua haapaohia te reira na roto ia tatou e ua haapao mau ia tatou i te parau tumu no te Feia Apî o te na ò mai ra e, "*E haamana'o. e ta'u tamaiti, e haapii oe i te paari i to oe apîraa; oia ia, e haapii oe i te haapaoraa i te mau faaue a te Atua ra i to oe apîraa.*" (Alama 37:35.)

Te raveraa i te mea tia.

Te parau tau e hinaaro nei i te a'o ia tatou i teie nei, o te parau ia no na e'a e piti, oia hoi, te e'a afaro e te pirihaio e te e'a aano. Te na o mai ra te faaiteraa a Mataio e, "*E tomo na te uputa pirihaio; te atea nei hoi te uputa e te aano nei te e'a e tae atu ai i te pohe: e e rave rahi tei na reira i te tomo. Te apiapi ra o te uputa e te piri hoi o te e'a e tae atu ai i te ora, e te iti hoi o te feia i îte atu i te reira.*" (Mataio 7:13-14.) Ua ite papu roa tatou e, i roto i to tatou nei oraraa o te mau mahana atoa ra, e rave rahi te mau faahemaraa o te tamata noa i te aratairaa ia tatou i roto i te

mau mea tia ore e te haamon roa raa'tu hoi ia tatou iho nei. E mau mana'o tia ana'e tei roto ia tatou atoa nei, a rea ra ia tae mai te faahemaraa ia tatou nei, e titaunhia ia te itoitoe e te puai i roto ia tatou nei no te parururaa'tu i te reira.

Na fea ia tatou te paruru-raa'tu i te reira? Na roto ia i te faaroo e te ohipa te haapaoraa i te mau faaueraa a te Atua e manuia ai tatou. Teie nei oraraa o te taime ia no te faaineineraa no te farerei-raa'tu i to tatou Atua. Haapao i te mau faaueraa e faaroo i te a'o a te Peropheta ora e a haere ai i mua i roto i te parau tia. Te opuaraa faaora a te Atua ra o te imiraa ia i te parau mau, e ua itea mai ia tatou teie nei parau mau i roto i te Ekalesia a Iesu Mesia nei, o tei faariihia e tatou ua roto i te pape o te pabezitoraa.

E ore roa e roaa ia tatou nei te ora mure ore na roto noa ana'e i te pabezitoraa, te toe ra o te tamau maiteraa ia e tae noa'tu i te hopea i roto i te parau tia e te faaroo. Te na ô mai ra o Nephi e, "o te tatarahaparaa e te pabezitoraa ra hoi o te uputa ia o te ora, e na tomo ana'e hoi na taua uputa ra, ua tae ia tatou i nia iho i taua e'a pirihaora a tae atu ai i te ora mure ore." (II Nephi 31:17-18.)

Ua tomo ana'e tatou te Feia Mo'a nei na taua uputa ra, tei nia iho tatou i te e'a. A haere ana'e i mua, mai te hi'o tutonu atu i te Mesia, e mai te tiaturi papu i mua mai te here atu i te Atua e te taata tupu hoi

I roto i te barabore nehenehe o te patu fare ra, (Mataio 7:24-29.) Faaau atura Iesu i te taata o tei faaroo e ua haapao i ta'na ra parau i te taata paari o tei patu i to'na fare i nia i te papa, e ia tae mai ra te ua, te pape pue, e te vero rahi ra, Aita i mairi i raro no te mea ua haamau hia i nia iho i te papa paari. Area oia o tei faaroo i te

parau e aore atura i haapao e au ia oia i te maamaa o tei patu i to'na ra fare i nia i te one, e ia tae mai ra te pape pue e te matai puai ra, mairi ihora ia i raro. No reira a patu ana'e tatou i to tatou mau fare i nia iho i te papa paari. Ia topa mai ia te ua paari ra o te faahema, e te pape pue ra o te mau ohipa tia ore ra i nia iho ia tatou, e ore roa ia to tatou mau utuafare e mairi i raro. A tamau noa ana'e tatou i nia i te e'a afaro, e te e'a pirihaio ra, e roaa mau mai ia te ora mure ore ia tatou atoa nei.

Te Faaipoiporaa.

Te parau maira te Fatu ra o te Atua e, "*E ere ia i te mea maitai ia parahi noa Adamu oia ana'e ra.*" (Genese 2:18.) Ua ite oia e mea tia roa ei hoa'ae to te tane e tia'i, e no reira ua hamani ihora oia i te vahine ei tanturu au no na, "Parau atura oia ia raua, no reira e faarue ai te taata i tana metua tane e tana metua vahine, a ati atu ai i ta'na vahine, e e riro hoi raua ei hoê," e no reira, te faaipoiporaa matamua tei ravehia i roto i teie nei ao ra, na te Atua iho ia i faatupu.

E ore roa te tane e tia e aore ta'na e vahine, aore atoa te vahine e aore ta'na e tane, ia haapao i te mau faaneraa a te Atua. Te na o maira o Paulo e, "*Aita ra te tane i taa ê i te vahine, aita atoa te vahine i taa ê i te tane i te Fatu nei.*" (I Korinetia 11:11.) Te faaroo nei te mau Feia Mo'a e, e oroa faataa-mau-hia e te Atua te faaipoiporaa no te taatiraa mure ore raa i te tane e te vahine. Te huru no te faaipoiporaa mau mai tei faataahia e te Atua na roto hoi i te hoo faahouraa tei faauhia o te ore roa e parari i teie nei

ao, e vai râ te reira, e amuri noa'tu. Te hoê taatiraa faufaa rahi mai teie te hurn, o te tae roa i te ao amuri atu, e tita-uhia ia te hoê mana rahi no te raveraa i te reira, e taua mana ra o te mana ia o te Autahuaraa mo'a, tei horoahia mai e te Atua. O tatou, te mau Feia Mo'a no te Mau Mahana Hopea Nei, e mea tia roa ia tatou ia titau i teie nei faaipoiporaa o tei opuahia e te Atua ia tia ia tatou ia faarii i te mau haamaitairaa rarahi no te basileia Tiretiera. O tatou nei ra, te mau Momoni o tei ore a i faarii i teie nei oroa, e mea tia roa ia tatou ia haapao maitai i to tatou nei oraraa e ia faaineine ia tatou ia faarii i te reira oroa i te taime e auhiahia'i tatou.

Noa'tu e, e melo tatou no te Ekalesia nei, e ore roa te reira e riro ei tapao e, e roaa mai ia tatou taua mau haamaitairaa ra, maori ra ia haapao tatou i te mau faaueraa a te Atua, e mai te au hoi i te mau parau a te Peropheta ra o Alama, "O te mea faufau teie mau mea i mua i aro o te Fatu ra; ua rahi atu teie mau mea i te ino i te mau hara atoa (*Alama 39:5.*) maori ra o te taparahi i te taata hara ore, e te hunaraa i te Varua Maitai râ ? No reira, e te mau Feia Apî o te Ekalesia nei, e haapao ana'e tatou i to tatou nei oraraa ia mâ maitai, ia tia tatou ia faaineine no te faaipoiporaa i roto i te hiero no te pae varua, no te faaineineraa'tu ia farerei i to tatou Atua. Ia na reira tatou, e roaa ia ia tatou te oaoa mure ore e te hanahana i te ao amuri atu.

Haapao I Te Maitai.

“Eiaha e vare, e ore te Atua e noaa i te haavare, o ta te taata e uene ra, o ta’na â ia e ooti mai. O te uene i ta to’na ibora tino, o te pohe ta’na e noaa i te tino ra; e o te uene i ta te varua ra, o te Ora Mure Ore ta’na e noaa i te varua ra.”

O teie ia te parau faaara ta Paulo i a’o mai ia taton nei. E te îte nei tatou i te hopea no taua parau ra, oia hoi, te huru no te mau taata iino e te mau taata maitatai.

A hi’o na i te mau taata iino. Ua roohia ratou i te mau huru ma’i, e aore râ, te tapeahia nei te tahi pae i roto i te fare auri no te ture ta ratou i ofati i nia i te fenna nei. Te pee nei ratou i te diaporo, oia hoi te rave nei ratou i ta’na ohipa i roto i teie nei ao. Te rave nei ratou i to te tino hinaaro e no reira ua ravehia te hara. E i reira ua riro ratou ei tavini na te diaporo, e ia tae te mahana haavâraa e faarii ratou i ta ratou utua mai te au i taua ohipa ra. Mai te mea e, e ofati te taata i te ture fenna e farii ratou i te utua i nia iho i te fenna nei, area râ ia ofati ratou i te ture ta te Atua i horoa mai na te taata, e farii ratou i te utua ia tae ratou i te mahana haavâraa.

E te mau taata o te rave nei i te ohipa ta te Atua i horoa mai na ratou, nafea ratou? Te farii nei ratou i te oaoa, e te poupon, e te mau haamaitairaa, e te haere noa nei ratou i mua. Ia tae ratou i te mahana haaavâraa e noa-a’i ia ratou te Ora Mure Ore, e e rahi a’e to ratou haamaitairaa i to te mau taata iino.